

制

義

叢

話

制義叢話卷之十八

福州梁旨鉅撰

余十歲卽隨先資政公游學於泉州之廈門廳廨繼至仙游縣之金石書院旋里後始肄業於檇峯書院時掌教者爲孟瓶樵師補弟子員後復從游於鄭蘇年林暢園二師之門明師益友受益孔多諸師之緒論遺文旣於前卷畧爲甄錄而良友之作有耿耿在心者聊記憶其一二以寓屋梁落月之感於以起發後進亦不謂無裨云

蘇東坡嘗謂舜受堯之天下不自立廟非也鄭康成據禮緯謂虞立五廟亦非也方文暢文以五廟七廟平分二股杭大宗知師說之騎牆另作一文以立七廟奏九成作對亦未見其的惟余友萬虞臣中翰世美作宗廟饗之二句題文最愜余懷其詞云爲五帝

一家之說者謂唐虞揖讓以從祖而傳之從孫則舜之宗廟卽堯之宗廟也然觀型釐降其事雖在制禮之前若祁姚同出軒轅則濟姓亂宗兩聖均不得爲人倫之至且夫爲人後者爲之子此從鞠育備至名分早定者言之也堯之禪未嘗子舜舜之立安得而父堯受人天下而變置其宗祧固非義之盡利人天下而自忘其源本詎可謂仁之至歟惟舜則又以饗之宗堯祖瑱所以明功德之所存而報本隆於所生則雖立廟京師不嫌於二統所以巡守告歸格於藝祖總師有命受在神宗迨作樂殷薦之年來格惟云祖考而丹朱且列於賓也想其時篳篥來自遐方旣備山龍之采椅袖充夫簞簋更羅水草之珍奉嘗而進依然以天下養之心焉非大孝孰能臻此哉爲帝王同祖之說者謂虞夏相承以旁支而入紹正統則舜不傳之子孫無異傳之子孫也然白馬韓流譜系

不載禹謨之內若嫡姁其宗顯帝則中興光復二姚且不得聯天
室之姻且夫父聖明者子不肖此自極盛難繼相形見絀者言之
也均之德繼天下則不足均之才守一國則有餘傳諸子則天下
受其病固不可以私而害公斯以國則先祖弗克延將奚以篤近
而舉遠乎惟舜則有以保之詢謀攸卜所以明天命之有歸而垂
裕遠及後昆則且綿歷殷周而徵諸百世所以象之傲也岳則陳
之朱之傲也禹則言之觀典樂命夔之日諭敎先於冑子則聖嗣
何憂弗類也迨其後鳳飛將育於姜旣寢昌而寢熾牛奪見侵於
楚且中蹶而後興保世滋大聿觀繩其祖武之休焉非大孝奚以
致此哉 按此文卽余與虞臣同在芝社會課之作故至今默誦
之不忘蓋經緯史根柢槃深而後準情酌理以出之固當凌駕
前脩非僅壓倒流輩也

吾閩嘉慶庚申鄉試首題此之謂民之父母出場後正同人評論
閨藝之時一日萬虞臣過余袖中出一紙曰此余莆田書院學徒
閻作君閱之何如余臚讀一遍驚服不已乃袖以呈鄭蘇年師亦
擊節歎賞以爲解元在此矣令余詰問何人虞臣固斬之蘇年師
曰此文若不元吾此後再不論文矣後數日虞臣又袖一紙示余
曰此亦莆田學徒之作未知視前目所閱何如余讀之又驚服復
以呈蘇年師師亦驚曰此魁才也必雋無疑日來閱文頗多皆遜
此兩篇遠甚旣而曰豈有佳文而皆出莆田又皆出萬某之門之
理吾滋惑焉余亦有悟乃固詰虞臣始皆認爲已作今兩藝皆已
借刻他氏殊卷恐久之不復知爲虞臣文也茲特止之第一篇云
天子作民父母核其實而知其難焉夫君天下者父母乎天下特
以分言之耳進求其實舍此好惡同民者其奚庸哉且王者所以

天下爲一家非徒無有斯民之謂謂其所以長民者有父之尊有母之親也雖然爲一家之父母易爲斯民之父母難爲一國之民之父母易爲天下之民之父母尤難蓋所保愈衆所求愈精而此心之誠愈不容於不盡是在引分自責者之無所苟焉耳矣君子之好惡同民若此此其明人利而達人患者息息與天下相感通雖父母之曲體乎其子不過如此也而君子已若此矣此其體之信而達之順者在在與天下相流貫即人子之仰望於父母尚不敢必其如此也而君子已若此矣然則詩所云民之父母非此之謂歟謂惟是勢分相臨則力征經營非不足以熙鴻號願大君也而聯以家人之誼所恃僅在名乎且夫謂之父母者本非其父母者也天合者雖寡恩不思其離人合者非大順不生其感陽奉以父母之稱卽陰挾一上實生我毋或濫我以生者以環起而相同

以是知勢分之不足言也惟此設誠致行之忱有以繫屬之而已
矣謂惟此私恩相結則驩虞小補非不足以龔榮名顯被澤也而
同於怙恃之恩相感詎專以術乎且夫謂之父母者其責望有深
於父母者也意在而權不屬親可以謝其子惠行而政弗舉君不
得以謝其民羣奉以父母之親早預設一欲報之德昊天罔極者
以相待於無窮以是知私恩之不足用也惟此大公無我之懷有
以怙冒之而已矣是故道有升降而同爲上天之宗子以司牧其
民非此卽無以建極而保極符兩大而謂之帝貫三才而謂之王
百代之舊章成憲皆以傳父母之精神而通德類情乃以履帝位
而不疚位隆首出而共處一王之天下以分理其民非此卽無以
引養而引恬以其可歸嚮也而謂之卿以其能扶達也而謂之大
夫百司之鞠育刑誨皆以宣父母之德意而翼爲明聽靡不分猷

念以相從蓋不愧于父母之名而所謂邦家之基保艾爾後者基
諸此矣平天下者蓋以之自考乎鄭蘇年師評云通體正鋒請下
引機清直竟可掄元中後四比之謂三字亦極有發揮此學養兼
到之文耳目前不易遇也第二篇云卽父母而核其實見周之所
以王焉夫父母孰謂謂成王也成王曷以爲民父母能公好惡以
絜矩也是可告萬世之平天下者且民之尊其君也曰赫烝曰天
帝曰皇王曰后辟所指雖同而惟之各有其義若夫君也而父母
之古未之聞也惟天以周克肖其德俾之奄四海而光宅制六合
以爲家不再傳而頌聲作焉於序休哉非大順大化孰能當此而
無忝者哉吾引詩而徵之好惡若此此凡爲父母者之所同也而
惟天子爲能充之以愛厥子者愛斯民始克滿乎其量抑凡有天
下者之所明也而惟君子爲能盡之以子天下者君天下庶不愧

乎其名吾於是而恍然於詩所謂民之父母者矣昔惟君文武宣重光丕克怙冒於天下其在周書常訓之篇曰天有常性人有常順順在可變性在不改好惡之謂也度訓之篇曰明王無樂非人無哀非人公好惡之謂也本典之篇曰生之樂之則母之禮也政之教之則父之禮也言人君能公好惡以爲民父母也洪惟沖人作其卽位不迷文武勤教罔不夙夜祇懼永思艱曰惟天惟祖宗全付予有家所以付任予者庶其在此於時羣公卿士亦皆明於好惡之嚮罔不惟民之承君子讀詩至南山有臺之節而知所謂民之父母者責難之義而非媚上之文也周之開基也以農事而受命也以武功誦七月破斧諸篇見當日之念民依恤民隱者莫非順人情而利導之而豈弟之恩統諸此矣周之取天下也以兵而安天下也以禮樂考周禮周官之制見當日之勅懋和畢樂

咎者莫非因人情而節宣之而尊親之戴不外此矣是故汝墳之
所謂父母爲文王言之也洪範之所謂父母爲武王言之也而此
詩與洞酌則皆作於成王之世其言可互相發明焉先之以嘉魚
者見父母之道必本於至誠繼之以由庚者言父母之心可周乎
萬物說者以爲邦家太平之基具在於是故其時三叛求卒殷憂
啟聖卒能削平大難永興鴻基謂非取舍審而父母斯民之道得
哉鄭蘇年師評云此題追空易巧微實難奇此作據詩世譜另翻
一新足徵根柢其馳騁才華灼然易見然步步仍納入題脈題位
故非同游騎無歸也

余官江南公餘常與節相蔣礪堂先生談藝先生嘗於乾隆戊申
典吾閩鄉試閒詢以闡中情事公言是科闡墨不少佳篇我總以
萬生世美文爲最佳擬元者數日後以同事公議置第九名至今

歉然按萬虞臣中嘉慶辛酉會試亦第九名聞初亦擬元是科余
先叔父太常公與陳綺石編脩同充分校時各總裁均以萬卷可
元惟彭文勤公意未決一日忽問先叔父與綺石曰二公皆閩人
本朝可有幾個會元答曰無之

按順治辛丑會元係吾閩陳常夏太常公與綺石一時偶失記耳

公曰既閩人並未得元則此闈卷亦無庸議同堂爲之匿笑綺石
已怒形於色先叔父目之而止出闈後爲余述之猶有餘恨其實
虞臣鄉墨首藝深穆之氣颯爽之姿允在元墨之右而會墨之遠
勝馬有章辛酉會元尤爲衆目其見衆口同聲者乃同一擬元之卷同
不得元又同改置第九名得不歸之於數乎今備錄鄉會兩藝以
質觀者庶不河漢吾言也戊申鄉試首藝恒公九合諸侯三句文
云以一人戢諸侯之兵所以爲天下才也夫九合不以兵車桓公
所以安天下也而非管仲之力不及此可卽其主而知其臣矣且

論人者律以先所共事之人而議其節之疎不若觀於後所輔成之主而見其才之大詰英明創霸之辟威信收重於一時試爲殫厥從來而後知禁攻寢兵非常人所克負荷也汝疑管仲曷觀桓公夫桓公之時一諸侯兵爭之天下也古者時會殷同正以邦交之典而列服焉得有兵端自時巡不舉而參盟要質之事煩苟能以一日弭數世之爭安在偉績不光於史冊古者八征九伐掌以司馬之官而強藩無所爲兵柄自政典不脩而遠交近攻之事起苟能以一國靖四方之氣安在長材不擅於春秋乃今考桓之霸也上自北杏下迄葵邱數十年之間其制天下之諸侯而獨攬其權者所以脩方伯連帥之職而非以佳兵躡武逞其心其萃天下之諸侯而厚集其勢者所以明講信脩睦之交而非以戰勝攻取張其伐斯豈中主之資所能勝任而愉快哉吾觀於九合之不以

兵車而知非管仲之力莫能爲矣非有屈服天下之畧必不能降
列邦之心志而使之平夫包藏禍心而無能安靖不堪任命而翦
爲仇讐封建非聖人所得已非以勢處於必爭哉惟仲之柔實足
以制天下之剛故招攜懷遠一本德禮以爲經而天下之桀然者
皆下數十國交爭之困弭以一身而晏如夫惟所挾持者大也非
有雄視天下之才必不能息當代之紛紜而使之靜夫好會力舉
或欲一矢以加遺盟言甫成頓思衷甲以相襲去兵爲未俗所難
言非以人情不古若哉惟仲之信實足以消天下之詐故恤患分
災常懷簡書之遺意而天下之狡焉者不欺數百年就衰之澤起
諸一旦而有餘夫惟所運量者宏也是以軍令之寄內政之脩以
臣子輕變乎祖宗而實本於養兵不試之意渠弭有偕環山有牢
在當日雖勤夫遠畧而究非出於興兵構怨之爲仲之力不可掩

而仲之仁於是不可及矣辛酉會試首藝堯舜帥天下以仁二句
又云仁可定國於古帝見之焉夫國之定民之從也帥以仁而罔
弗應其卽堯舜所以成教於天下乎今夫教之成也斯民罔迪不
適之謂也然有其本焉在所以先之者而已矣古聖人之於民非
必家至而戶見之乃民一觀感乎聖人所以成教於家而疑者已
明怠者已奮官師之董勸猶其後也一人定國吾於陶唐氏之天
下得一人焉曰堯更於有虞氏之天下得一人焉曰舜古之天子
日月所照莫不祇膺雖建邦設都而風化不殊焉其視天下猶一
國也抑古之天下萬邦黎獻其惟帝臣凡意諭色授而六服已傳
焉其治國已兼天下也吾不知唐虞之天下何以定也夫惟有堯
舜焉故吾初不知唐虞之天下何以定於天子之一人也夫惟帥
以仁而民從焉故教典之設所爲迪天下以爲仁顧民之服其教

者堯舜以一人爲之倡也惇典庸禮我安之民亦安之天倫之樂堯舜久入其中而深知其故其使天下其爲之者其先天下而爲之耳乃無何而百姓昭明矣無何而四方風動矣蓋民之曉然於匡直勞來之非以強我也固已久矣刑官之命所以警天下之不仁顧民之畏其神者堯舜以一人爲之坊也不親不遜我傷之民亦傷之天性之恩堯舜際乎其難而處之不失其與天下其去之者其先天下而去之者耳乃無何而治期予治矣無何而刑期無刑矣蓋民之曉然於明刑弼教之非以迫我也非一朝矣蓋帝世多才執簡珥筆其人類皆聖賢之徒其於堯舜所以帥民者實能觀其深而復徵之於顯於危微精一而識仁道之精於睦族惇典而識仁道之切動其本也化有原也可以規主極之醇也古風尚樸鑿井耕田無所資於更化之事其時下民所以從欲者方目動

於天而不知誰之功。澹然無營而知識忘。渾然無迹而帝則順風。自上而流及下也。可以觀大化之行也。蓋有而後求。無而後非。三代所以長有天下。亦未有不由此者也。

鄭蘇年師嘗語余曰。吾子謂萬虞臣鄉會墨皆可掄。元固非阿好之論。然我以為虞臣鄉墨雖佳。但與韓學秦作實難爲軒輊之分。其會墨則理醇詞茂。實足式靡振浮。若維之前明元鑑中。幾無以辨。而余尤心折其第二藝。百姓足君孰與不足。四句題文緊切魯國立論。能使數百年及當日情形瞭如指掌。非貼括家所能猝辦。聖門告君大抵如此。此文所爲可傳也。其中後四比云。且夫用之不足也。其故有二。要皆起於民而君受之者也。禽父造邦之初。政役惟從。夫天子故三郊三遂供一王之職貢。而有餘。迨葵邱官受方物以來。齊霸衰而屬於晉。晉霸衰而朝於楚。且晉楚之從交相。

見又數十年焉用是會盟征伐史不絕書玉帛犧牲歲難預計我魯既以悉索敝賦者重困百姓大國亦得以誅求無藝者重困吾君於是君徒蒙加賦之名而曾不得輸之內府也史克作頌之日賦法尙準乎周官故公車公徒資一國之捍衛而足恃迨三子盟於僂闕而後作軍而公室判爲三舍軍而公室分爲四而公臣之屬於君者不備三耦焉加以入私室者無征入公室者倍征隱民取食君既聽其流轉而棄之如遺馬牛維塹臣得加之噢咻而收以爲利是君徒設重斂之科而惟日按夫空籍也今君欲自爲計曷先爲百姓計徹法行而罷非時之役以開其源省無名之費以節其流制三十年之通以禦其變贏則俱贏孰與君以不足者乎且君縱不爲百姓計曷亦自爲計徹法廢則田制淆而多寡不均措克興而囊橐中飽爲不終日之計而無救於貧絀則俱絀孰與

君以足者乎然則淳下之經良救時之急務也歟郭詔溪曰此一篇名臣奏議也掄元云乎哉

陳恭甫

壽祺

深於經義作時文好用經語排纂而不肯雜以他書

後因屢黜春闈乃勉趨風氣憶己未場後告余曰我今科必中文中全用汲冢逸書及緯侯中金鏡玉樞等字但恐榜後不免磨勘耳榜發果中第十九名聞朱文正師在闈中極賞此卷而斷無掄元之理因告人曰十八房中各有一房首謂之房元雖主考不能與爭惟十九名始爲主考所專亦與各房無與此卷才氣煥發根柢槃深出於總裁所定名爲總元可乎

陳系甫與謝甸男以同年而並馳文譽系甫文喜組織經語如塗塗附甸男常規之甸男文亦好隸事而風骨較迥余常戲以雉竄文圖鷺集翰林兩語分贈二君二君皆不受其實皆文筆鳴鳳也

恭甫鄉墨毋曲防毋過羅文最爲時所傳誦而向男文又勝之今
並錄二作以見二君才筆不相頡頏特蹊逕各別要皆足爲吾閩
樹赤幟也恭甫文云請言桓公之五命其一曰無曲防凡天下之
地勢兩山之閒必有川大川之上必有涂故防者池渠之所以爲
固也宋之大水天災爲病魯之淫雨國史屢書貴乎障隄之脩利
焉且夫遂人之經野也十夫有溝百夫有洫千夫有澮上地毋敢
侵界也稻人之稼田也以瀦蓄水以遂均水以列舍水下地毋或
塞流也乃不能禍福同心專利而欲以鄰爲壑遷害而俾其民爲
魚則曲防之爲禍最烈維齊當日府海致壘蛤之饒守澤無舟鮫
之禁豈於防而私之姑無論州有賴湛豫有波汪冀有汾潞而水
潦之備豫不巧於轉移斯數世賴之耳不然者周之衰也穀洛流
壅諫於子晉矣晉之遷也仰瑕水淺議於韓厥矣旱乾水溢澤浸

未通而強則鑿邪情之流虐則決管湯之水豈其道哉其一曰無
過釋凡國家之制用無九年之蓄曰不足無三年之蓄曰非國故
糴者緩急之所以相通也雍涓汎舟接於故絳臧辰告糴使以上
卿足見賑恤之厚施焉且夫司儀所掌積問有禮饗餼有禮贈賄
有禮其常罔弗待恩也行人所掌賻補有文犒贈有文賜委有文
其變罔弗受惠也乃不能吉凶同患乞糴聞庚癸之呼貸粟少釜
鍾之授則過糴之爲害滋深維齊當日公子以賑衛遺仲孫以省
魯難豈於糴而斬之姑無論遣人備未荒廩人備將荒司徒備旣
荒而饑饉之游疎不吝於饋助斯四國惠之耳不然者晉不輸秦
背施幸災西鄰有讐矣庸皆叛楚興師就食東道誰供矣挹斗簸
箕嗷嗷莫訴而怒則刈琅瑯之稻怨則取成周之禾豈其道哉原
評云藻彩繽紛聲情激越似讀子山孝穆之文 甸男文云今夫

邦交之替久矣自幽野好會而後諸邦君俱以不穀之故釋憾於友邦意良厚也然貪利開怨之端非獨爭地爭城有之也卽防與糴亦當謹焉天生五材水爲首資利溥而成功多故溝瀆川渠先王定其制於匠氏遂人之職而激淫蓄洩更揆其勢於稻人而後樹藝之宜無憂旱澇王有八政食居先下養生而上足國故稻梁黍稷職方別其產於土宜土物之中而移粟通財更委其權於司救而後邦國之用不患凶荒則是曲防也遏糴也固王命所戒也寡人願申之曰無曲防無遏糴蓋嘗統天下之大勢而觀之而知中原之水防宜善也夫三山爲吳會之區七澤爲荆南之藪地卑水聚故無待乎疏決之勞而富饒甲海內焉若夫中原之地溝洫之制旣漸壞於戎車河沛之流復日徙其故道其爲灌漑也難矣雖秦有涇渭晉有汾潞周有河洛而土燥田高待澤恆憂其未徧

使土流者復墮其隘以自豐則地利旣形其細鄰封復便其私苟襲是迹而動者紛紛也果何如溥其潤之爲愈也哉蓋嘗攬九州之地宜而考之而知西北之區羅居多也夫魚鹽擅秦岱之饒禾稻實青徐之產天地中和故無事仰資於異國而豐祥頻見告焉若夫西北之方稷麥之種非可以久蓋藏高亢之隅且復時逢風旱其爲資藉也宜矣況齊有三男衛有七族晉有九宗將戶廣人稠取給更虞其莫逮設托庇者且閉其藏以自足則天時之不若方塵隱憂強鄰之幸災更傷坐困使效其尤而起者比比也則何如普其惠之爲得也哉夫汪洋不竭分之可藉脩和陳積相因聚之徒供朽蠹天下之物願與天下分享之利不專而怨不長兵革之氣所以日消也且沽濡者遍則鄰豐而我亦無出粟之煩矧委者多將我歉而鄰且有汎舟之舉人我之迹願與天下共忘之患

相恤而無相通玉帛之交所以永固也原評云天下形勢古今水利瞭如指掌而以健筆達之足以推倒一時豪傑開拓萬古心胸郭詔溪於榜後議刻硃卷而深以第三藝不愆不忘率由舊章文爲不佳屬余大加脩飾余力爲刪潤意總不嫌乃轉以屬趙穀士穀士曰此原稿無可著筆不如另作一篇時穀土方銳意舉業竭一夜之力竟別成一藝運用壁經如自己出硃卷甫出幾於紙貴洛陽後余選八閩文典制鈔仍題詔溪之名一時皆未知其出自穀士也今爲正之其提比云夫假樂之詩嘉成王而作也冲齡負展恆多弗克經歷之憂遺大投艱不叩自恤矣惟政事其爽侮敢冀無窮之基無窮之聞也要以東西澗聲靈永寂繼承者責在文子文孫戡定厥功詎得云誕無我責焉多難興邦常深懲前毖後之懼蟲拚蜂螫鳴烏無聞矣弗造哲迪民康曷勝無疆惟休無疆

惟恤也要以昭穆考方策猶新敷遺者自多成烈成式不克遠省
詎得云乃是不獲焉後比云開基之主前無所憑藉而興者其詒
謀或猶有弊我周自有邵卽室以來代生賢哲則舊章所垂與夫
發憤爲雄者異矣嗣前人恭明德者復何必多求也惟王殫厥心
而答揚先訓則率大卞焉無別播敷則率大受焉單文祖之德知
甯王若勤將子就之繼猶泮渙耳此之綱之紀所爲怨惡俱消也
哉初業之朝前無所參酌而定者其法紀或有未精我周自藩臣
繼統以來監于夏殷則舊章所布與夫事不師古者殊矣嗣無疆
大厯服者復何庸臆遑也惟王宅丕后而保民有術必求聞由焉
作罰有常乃其述由焉守文王敬忌道甯王德延在後之侗莫敢
昏逾耳此宜君宜王所爲穆皇可式也哉按二比中取經語分貼
率由二字字甲新意此是穀士之長技憶余與穀士會課作新民

題文穀士緊靠注中鼓之舞之之謂作句將鼓舞二字分比發揮出比末句有發乎鼓之而已矣對比末句有軒乎舞之而已矣惜不能記其上文數向其家索閱此稿亦不可得

吾聞鄉墨之可觀自乾隆己亥癸卯丙午戊申諸科外卽數甲寅是科三藝皆典實題故所拔多積學懷才之士文亦稱之而求其骨法典重可式浮囂者則以黃雲岡瓊文爲最題爲賢者識其大者三句講下入手云今夫聽遠音者聞其疾而不聞其舒望遠物者察其貌而不察其形立乎今日以指周初周初之日遠矣識焉而已然而識亦有辨夫道不有其大者乎昔君文武宣重光體國經野以爲民極而其要在有猷有爲賢者繼往開來筆之經以立教二南爲王化所基昭諸四始八誥述王猷而作列諸百篇雖無老成尙有典型道之所以張四維也道不又有其小者乎昔君文

武丕平富勅業垂統爲萬世規而其治亦至纖至悉不賢者一知
宇解廣其說以爲傳近取遠取之微演之在圖象敬勝怠勝之辨
銘之在盤盂先民有言詢於芻蕘道之所以重小物也後此云陳
名山石室之藏上哲中材亦若選士造士俊士之殊其目然而居
今之世志古之道以自證也正使知者見知仁者見仁而未能盡
識而徧觀者要各得其性之所近湖鳴鳳流鳥之歲風微人往安
必世道世法世則之匯其全然而以天之道先王之靈不有甯也
正使疑以傳疑信以傳信而凡在博聞強識者要不等於善之無
微按雲岡孤貧苦學中年得略血疾尙徹夜呬唔不休鄉薦時已
逾知命之年遂不復與計偕踰年遽逝無子詩文稿皆散失此文
其青光片羽因亟錄之以慰亡友於地下云

尤王派之興莫盛於嘉慶初年年少聰穎之徒費數月之功卽能

得其形似場屋中亦易以悅目幾成捷徑其實則但以字面塗澤豈真有經籍之光哉惟余友許蔭坪德樹以精心果力爲之不愧劉舍人所謂樹骨訓典之區邇言宏富之路者蓋字字從經義中出非可以一蹴幾也如詩曰妻子好合一節文云夫常懷周公燕兄弟而作也王與族人燕則宗婦內宗屬亦從后於房中故其詩言兄弟兼言妻子蠅宿於車士多怨語鸛鳴於垤婦有歎聲破斧缺斨妻子久興契闊之感矣今日者肆筵授几幸得備言燕私焉則門內肅雉能勿念弋雁星明聽雞月出徹桑陰雨四國遑音拔木風雷三年遑尾管詠霍降兄弟久深天顯之悲矣今日者坎鼓蹲舞幸得其和獻酬焉則堂中聚處能勿念蒿蘿松上瓜瓞林間詩故曰妻子好合如鼓瑟琴匪悼終風之暴匪懷陰雨之悲執紼執翻睦之至也又曰兄弟既翕和樂且耽匪猷而木也升匪羊而

葦也踐吹壘吹簾薦之至也由是而門內之觀感可知矣繼之曰
宜爾室家樂爾妻孥猗歟盛哉不禁因之而有感矣我周之盛也
聽洲中之鐘鼓蒹葭泮我衣吹堂上之笙簫有頌者弁聖王祇本此
刑于友于之事以化被無窮斯詩非絕習習之風欬杜少菁菁之
葉矣今卽榛山荅隰渺不可追而白詩言想之匪弓之嗣匪幅之
脫笑談款洽儼然觀宇宙之太和焉是故馬非元黃草非監綠偕
老者鳳凰于飛河無萬壚野無遠槁一木者脊令急難夫何有興
嗟發竒致歎閨牆也哉我周之衰也咏英英之雲有鶉歌漂
漂之雪爲馬爲駒天子苟忘夫敵體同體之親以倡率于下斯渭
涇或慨于淇上本根不庇於河湑矣今卽匪風下泉降而愈下而
自詩言憶之臬弋於林鶯遷於谷至情淪浹猶想見雍穆之休風
也是故鵲鳩以頌其德豈曰比予于毒以我爲讐牡荊以聯其歡

誰不式好無猶莫遠具邇夫何有御冬之苦見睨之悲也哉吾鄉
鄭蘇年師評云一部葩經躬爲碎錦巧心密麗乃爾郭景純又有
筆在作者處耶 又國家閒暇及是時明其政刑文云時而加之
以師旅也羊牽於境牛奪於田攝大國之閒誰非角鹿指可掬終
夜有聲也腦可鹽詰朝相見也疆吏來告曰某人伐我東鄙某人
伐我西鄙則相加一旅何能董治六官時而因之以饑饉也薪浸
於泉磬懸於室問牧人之夢誰卜多魚井有逃嗟魚之疾也山有
諸思酒之盛也太史特書曰某年某月大水某年某月太旱則雷
有三星何暇書懸浹日有如一曰者野無三軍之擾人有二脯之
供伊可懷也不可恃也時乎不再來曷弗來旬來宜鐸鳴其化曷
弗惟察惟法鼎鑄其書鵠與鶴金鼓無聲蛇乘龍抵京未乏一則
以喜也一則以懼也時哉弗可失曷弗掌其治於太宰乎及豚魚

易弗詰其禁於秋官乎乎雀鼠及其時而明其政焉政在於士族
師黨正握其權政在於農鄴長里宰掌其令推之司關掌節察於
門司號司稽巡於市莫不有專司之任卽莫不有舉錯之宜人主
端其原斯左右臣鄰其勵山黨其敷雷而突由是萑楚無變合正
德利用厚生成三事若華莫歎上和親康樂安平爲一書夫何有
伎足之鹿墳首之羊哉及是時而明其刑焉郊野之刑遂上察其
情都家之刑方士聽其獄推之髡者使守積刑者使守門莫不有
辟以止辟之心卽皆可臻刑罰無刑之治人主敦其化斯箕風畢
而共懲束矢其懷鈞金矣是故無牙無角疇興歎于穿墉如焚如
礪亦畏威于異室夫何有魚網而鴻龐兔羅而雉入哉 又以其
數則過矣以其時考之則可矣文云運未際乎貞元則板蕩興歌
亦空切斗箕之歎若麓之榛化爲禾黍豐之芑廢爲苞稂則屈指

以期何卜鼎已符而瞻烏未集理非關先剝復則倒懸未困何煩
急弓乘之招若狐莫赤戒切虛徐魚已積悲深枚肆則窮而必反
何兕猶率野而鴻未于垣吾爲計其數白狼銜環去隨刊者幾何
世赤烏流火去旆鉞者幾何年今何遲之又久竟莫繼豐鎬之休
乎西方之美人不作幾令我搔首而思也過矣吾又進考其時草
兮何處不元不黃婦也終朝采藍采綠夫豈休風未泯不必思釜
鬻之漑乎北門之賢者無憂或者其彈冠而出也可矣而吾之心
乃迫矣夫使前此數百年來上有守文之主下有佐理之臣長楚
無憂人佩姬公之舄若華莫歎家封召伯之棠則雖數過之餘予
何妨忍與終古乎今考其時兩國不和斬首者數十萬五軍遠涉
下城者七十餘彼民何辜而髮繫於繩指鞠於水也望平原而憑
弔集澤者雁率草者狐知我如此不如無生矣榛一山兼一水我

何必食鯉食魴而天時人事之交乘有不能翹然於懷者乃可有
爲而竟不得有爲也此予之所以長太息也而吾之志愈悲矣夫
使前此五百年時得一撥亂之聖得一佐命之賢鼠之食黍變爲
菟之在置鵠之集桑變爲鴻之遵渚則雖數過之後予何妨泯沒
無聞乎今考其時負游俠者彈鋏而詠無魚說從衡者挾矢而談
彈雀彼民何賴而鼓瑟受相印吹笙列侯門也瞻朝野而錫心罄
懸於室薪浸於泉鮮民之生不如死之久矣檀欖坎諸桑間諸我亦
甘泌水衡門而悲天憫人之心事有不能漠然置之者乃若反手
而竟不得藉手也此予之所無可如何也合此三篇觀之雖使西
堂農山復生當讓一頭地何況餘子然則尤王派顧易言哉

制義叢話卷之十八

制義叢話卷之十九

福州梁章鉅撰

陳采屏廣文

廷煥

與余同受業於林暢園師采屏最工制義每括

一題輒作迴不猶人之想嘉慶戊午吾閩鄉試首題唐虞之際次
題陳其宗器三題周室班爵祿也如之何甫出場卽號於人曰我
首藝專做之字次藝專做其字三藝專做也字似可以偏鋒取勝
人皆怵其言惟余稔采屏文必以徵實見長姑爲此謾言欺人耳
是科果雋則三藝皆興高采烈之作首藝云合二代以論才甚重
乎其際也夫堯老舜攝之時乃所謂際也其時之才難分屬故以
唐虞之際統之今夫史臣之作史也一代之事則必括於一代實
錄之中若其事之無所專屬則又必於其中別之曰此某代之際
月表也此某代之際年表也往者竊思著作之體宜然乃今論才

而及帝世亦以爲當用是例也才雖不其然乎夫上古無才之名而元凱始有才子之目則世之傳有此語意者其在唐虞時乎夫唐虞固才之藪也然而有鰥未錫之先巢山高蹈孰是惠疇亮采之臣其繇備官莫勝庸命總師之任矧朱稱不肖又奚足以揚衢室之休故帝堯七十載以前無書可讀而亦無才可紀也文祖既格以後雷澤非無七友而其去已遠諒難強屈以功名伊耆尙有兩兄而其齒旣衰豈能久資其佐理雖益年獨永亦祇幸其有一老之遺故帝舜五十年以後無史可編而亦無才可錄也若夫詢事考言處二十二人之上賓門納麓慙二十八載而遙則誠所謂唐虞之際也古皇各垂其記載而堯典冠以虞書則已合兩代爲一代矣而於論才豈獨否蓋廷臣之奮發本關川嶽之鍾靈尙謂堯所留貽則分職命官實山嶽納尙謂舜所結納則禹稷契半

屬族家惟渾而舉之曰唐虞之際則帝廷既無易姓之嫌而諸臣自無故國之感都俞吁咈且將泯識知於渾噩之天又詎論位號之殊也古帝各私其氣運而唐虞統號中天則已合兩朝爲一朝矣而於論才豈獨否蓋帝臣之肇興實萃扶輿之間氣倘祇謂爲堯之佐則疇咨疇若何以罔命乎皐夔倘祇謂爲舜之鄰則平地成天皆以終堯之志事惟統而言之曰唐虞之際則兩聖既無招羅時望之跡而羣臣自無比肩昆弟之心拜手颺言且將等揖讓於世及之禮是何如遇合之奇也夫尙書所載不過攝位數十年之事非全史也子論才而及其際則由此以推其紀月也謂爲唐虞之際之月表焉可耳其紀年也謂爲唐虞之際之年表焉可耳論者弗察於此果何以見其盛於斯哉

采屏於乙丑成進士榜後名公巨卿爭欲識面其會墨亦皆奇情

鬱起首題爲老者安之三句劈分三比皆緊切夫子本事現身說法每比皆作數層鋪敘配搭精穩極才人之能事而得之風簷寸晷尤難宜其名噪一時也文云今夫感星而河洛授圖卜獵而熊羆叶夢此自皇王之偉業韋布不必然也蓋吾固自有吾之老者耳讀考父之銘本國猶須勸扶門之烈先人豈少同官固當敬以事之矣然而安之之志不必隨遇而遷也訪南國之丈人尙荷三湘之蓀則傷其形之已勞也拜東京之柱史猶司六代之書則恐其神之已憊也外此迷陽有曲通既耄而逃名爲倂有譏歎方衰而遁世所以誘掖而變化者欲求其心之所安非徒博其身之所安也此則所爲有志未逮者耳今夫漁雷澤而交靈甫詠免置而接閭天此自帝王之大度儒生不必然也蓋吾固自有吾之朋友耳過舊館而流連脫膠以瞻望征途而首接傾蓋而談良爲

白首如新矣然而信之之志不必因人而異也嬰爲八載之交而有尼谿之沮反其仁而無所怨也壤無一日之戚而有狸首之歌反其敬而不忍絕也外此莫安已往猶懷曠代之音遽使方通更切他山之助所以聲應而氣求者固信在性天之際非信在耳目之前也此則所爲心嚮往之者耳今夫顓頊十二而揚於廷蒲衣八齡而登於野此自聖神之盛軌師儒亦不必然也蓋吾固自有吾之少者耳參年十五而詩書之側已聞一貫之傳偃年十六而陳蔡之圍已備文學之選信爲孺子可教矣然而懷之之志不必擇人而施也項橐之見雖偏而達巷早傳其緒論則小子庶幾有造也孔璠之齒雖未而闕黨已見其周旋則童子未必無知也外此鯉也學詩當日固已懷過庭之訓伋也繼序異時亦當讀先世之書所以刻勵而裁成者固以率德迪教爲懷非徒以持攜保抱

爲懷也此則所爲念茲在茲者耳按武進程文恭公少者懷之文同此徵實作法然彼是單句題此則尤爲其所難耳

程文見第七卷

次

藝爲喜怒哀樂之未發謂之中題亦劈分四比而於講下總提數語云吾以爲未發之時其在易也則爲方畫之卦其在書也則爲未演之疇其在世也則爲太初之運其在人也則爲赤子之心聞內籛得此卷時傳觀殆徧而後比云運有升降而窻初之世無所謂降也亦無所謂升爲中字證佐確鑿更無人不拍案驚奇矣阮雲臺師最笑近人之讀時文者謂之唱文而福州人尤喜拍案豪吟幾有擊碎唾壺之概如蘇年師喜誦湯文正公見善如不及章後二比孟瓶菴師喜誦方望溪君子不器中二比龔海峰先生喜誦陳句山見賢而不能舉節中二比劉心香喜誦薩相河子曰關雎中二比高聲大叫旁若無人每遇觴政中有罰歌唱者輒以

此代之一日心香語余曰澠檀河文余曰沐已久有似此聲色並
足者子能爲我更作兩比乎余曰君素不善短篇必須長比方發
君意無已則吾友陳宋屏有伯夷叔齊餓於首陽之下後二比其
橫恣不減檀河也因錄付之其詞曰蓋其心以爲率虎賁而關國
寔中險阻所在難憑矣而首陽則覬覦所未及者也從來窮谷深
山道無升降自茲以往其有奉書策傳而來者哉敢託先帝之靈
以卻之使知空山自存甲子余兩人愚衷所布甯大變鑿井耕田
之局豈忍習牽羊輿櫬之風且更幸肝腦所塗長委茲蔓草寒煙
永絕檀車塵垢也世運雖遞遷乎三千人推之不爲多一二人挽
之不爲少而甘心殺伐者風氣難成矣過名山而祭告所在神祇
其爭媚之矣而首陽則柴望所未及者也從來僻壤輿區俗無今
古自茲以往其有拊心扼腕而前者我敢啟古皇之宇以庇之使

知末世亦有唐虞余兩人義色所形完髮膚以全父母之恩留氣
運以報乾坤之德且更幸薇蕨無餘不至使草木菁英再沐與朝
雨露也天智雖自熒乎九州之區宇不爲寬一坏之版章不爲隘
而戮力從戎者汗顏無地矣心香得之大喜然余自是與心香分
手不知其果然持誦如檀河文舊事否今心香墓有宿草而采屏
亦別將三十年亦不知其尙健文否也

福清郭韶溪學正本嶺嶺村農性嗜書史因試事至福州常至舊
書店繙書有焦姓書賈與之善引至蘇年師館中求附學師一見
卽賞異之韶溪貧而力學善質問辨難文筆迥不徇人與余交最
篤嘗私語人曰他年福州城中繼吾師而主持文事者必藍林也
同人或以爲狂乾隆乙卯登鄉魁題爲乘殷之輅兩句是科解元
文係捉刀人所爲聞墨亦不嫌衆論惟韶溪文獨出冠時後二比

云或謂夏有車正之司周列考工之記而殷無專官則輅疑從其略不知惟其略也而制乃盡善也嘗讀商頌五篇慨想夫車振八鸞欽元王之桓撥旂傳十乘矜白馬之婆苴雉是而乘圓蓋信遷亳遷相遷囂遷耿遷殷而不敝或謂夏有母追之制殷傳章甫之名而周猶委貌何冕獨異其名不知惟其異也而制爲尤精也試開王會之圖仰見夫冕無繁露有赤芾陰羽之臨冕有繁露承唐公虞公之制稱是而服且得備爲袞爲鷩爲毳爲希爲元而非奢林暢園師曰不必有深意而風華典贍定非窮措大所能爲此榜前批語也後韶溪聯捷成進士授國子監學正旋乞歸里習陶朱計然之術竟成富紳制義之足覘人福澤如是

韶溪嘗與余同在瀛社作舜亦以命禹題文韶溪文爲校閱者塗乙殆盡批曰通篇無一是處余爲之不平重錄一紙送萬虞臣校

閱批曰醞釀經腴乎甲新意茲節錄之以詗觀者起講云嘗讀書
有曰文命敷于四海卽繼之曰祇承于帝明乎其有所受耳然自
受者言之則爲承自授之者言之則爲命非有異辭也後聖之所
傳一本前聖之所貽而已起比云堯舜之書曰典爲君之事獨詳
大禹之篇名謨爲臣之事尤備執君逸臣勞之說則廿八年之攝
政已異於十三載之荒功似舜之承於堯非卽禹之承於舜也禹
謨載虞史之中志三聖相傳之統禹貢冠夏書之首見一王受命
之原泥帝升王降之談則恭已之無爲迥異於隨刊之任力似堯
之所以命舜非舜之所以命禹也後比云中之說一見於皋陶五
流有宅惟斯民之克協厥中禹皋所以同爲見知之聖也然命皋
者用於民舜庸自著其兩端是執之道命禹者承於帝舜祇自託
於一詞莫贊之爲且如舍義鈞於弗嗣禹之天下何一非舜之留

貽而受命告虔必於神宗之廟亦謂數典不忘其祖焉耳中之旨
一衍於洪範九疇攸敘惟皇極以居中爲常夏道所以獨爲得天
之數也然天之命禹者其道遠一五行惟託於圖舜之命禹者其
道邇十六字親承於帝且如溯顓頊之宗祧舜之本支方且於禹
爲至戚而書成實錄必從協帝之稱亦謂心法自有淵源焉耳後
萬虞臣知其事曰此文亦太不講聲色明珠暗投是其自取也

吾鄉乾隆乙卯一榜以郭韶溪葉次慢爲巨擘皆暢園師館中高
足也場後吾師評隲聞藝決韶溪後比與次慢起比爲必中之技
果皆高標韶溪文已見前今錄次慢兩起比以貽觀者文云我武
陳師埤野檀車僅繫於駟驟且五等掌自巾車尙留木輅知樸屬
不徒前代也特稽古必推盡善而椎輪已邈獨懷然天乙之治嚴
勝朝崇祀鬼神黼黻常昭於灌獻且昭代取其章甫用配元端知

文物堪垂奕禩也特踵事未免增華而玉藻有經尙恍乎西京之禮盛按次幔此文中比未嘗不切響堅光讀之不能割愛因並錄之文云昔殷先王因鸞鉤而肇造萊雝實贊其成焉當日采文尙闕而以渾堅永不匡之利自異乎玉金朱象之傷華故朝無典路之司而十乘歌於寢廟國乏考工之職而一駢紀於稗官且也一衆志而破奇肱其意不馳乎淫巧乘之而白馬備來賓之典素車隆禱雨之儀行地無疆真可遵道而遵路矣昔周天子命弁師而成式貴賤咸昭其等焉當日文明大啟黼黻聿新而以采錯崇元首之尊大異乎章甫母追之近陋故後則高而前則俛藻火益耀其文章筭以貫而衡以維金玉務彰其追琢且也會成周而垂繁露其儀早著於爰闕服之而遂延增龍衮之光織組盡筭衡之飾作觀爲昭斯誠可畏而可象矣

鄉黨敘擯禮中有趨進一節向皆誤解爲入門時考注疏皆不言趨進在何時惟江慎修先生據聘禮謂當在中庭相禮之時凡發足向前爲趨當君迎賓入門擯介皆隨後雁行及廟上相先入此時安得有趨趨則在君前矣且經傳未有以入門爲進門者故詳考之詳先生所著鄉黨圖考中按王梧鳳有趨進翼如也賓退題文中幅引左氏傳公孫僂趨進事恰好渡下而余記得趙鹿泉先生初蒞閩中課鰲峰書院以趨進爲題余友曾建堂秉文文中厯引左氏傳中成三年齊侯朝於晉將授玉卻克趨進曰此行也君爲婦人之笑辱也襄七年衛孫文子來聘公登亦登叔孫穆子相趨進曰諸侯之會寡君未嘗後衛君今吾子不後寡君寡君未知所過吾子其少安襄九年同盟於戲晉士莊爲載書鄭公子駢趨進曰自今日旣盟之後鄭國而不惟有禮與彊可以庇民是從而敢有異志者

亦如之昭十二年晉侯以齊侯宴投壺公孫僂趨進曰日旰君勤
可以出矣定八年晉師盟衛侯於鄭澤將歆涉佗援衛侯之手及
挽衛侯怒王孫賈趨進曰盟以信禮也有如衛君其不惟禮是事
而受此盟也凡五事爲證鹿泉先生擢冠其軍大加獎異同時學
侶亦無不驚建堂之博洽而不知是時江氏鄉黨圖考新出此段
全具其中特同人見者尙希而建堂獨先記而用之建堂雄於文
爲林暢園師快婿與余同受業其知名於時則此文筆之矣

郭蘭石編修

尙先

在詞館極有聲行楷書傾動一時而詩賦次之

不知其時文工力之深亦不愧爲陳句山管輅山之亞蓋蘭石爲
萬虞臣入室弟子未領解以前卽在福州讀書每一課文出虞臣
必袖其稿以示余惜其時不暇錄副閒付逢兒鈔存一二而已迨
余重入京華蘭石常到余寓齋談藝適家塾中魏和齋太史

建中

以燕毛所以序齒也題課兒輩蘭石日記我曾作此題惜此稿今
不可得時逢兒在側對蘭石背誦兩北云序之於時享之時入四
親之廟者少長以次焉夫膺茅土而分封昆弟定君臣之義繼宗
祧而立廟支子無富貴之加平日之不敢遽以齒序也明矣而當
西序散烝聖天子雍容揖遜雖立宰夫以獻酬仍藹然動曾孫維
主之誼犯尊而浚長也獨何心乎蓋至蒼顏白髮攸攝威儀而後
知尙德不尙年之說先王之義正天下則然而賢賢之例弗參於
長長序之於合祭之時登大廟之廷者尊卑以別焉夫族食之降
世一等親恩漸殺於總麻爲酒之命合季冬盛樂僅陳於大寢平
日之不能恆以齒序也審矣而當鐘師入奏我祖宗後祿寵綬雖
立異姓以爲賓仍取諸天家近戚之班合愛而明倫也斯爲盛耳
蓋至暮齒稚年共敦禮讓而後知養老皆引年之道先王之孝治

天下則然而老老之典可達於親親蘭石大叫曰此正余舊作一字不差汝何以能記之逢兒謂此殆餅萬虞臣先生館中課藝蘭石曰非也記得此是應鰲峰書院新任方伯官課所作逢兒曰然則此文必冠軍無疑蘭石大笑曰豈但冠軍乃榜末倒數第一名也驚問其故則爲對比總麻二字被抹耳合座亦爲大笑

郭蘭石時文不矜才不使氣但以蘊藉勝人而氣候自不可及余最愛其魯一變至於道題提比云有謂太皞之墟久相安於柔靡則宜變之以强者顧風俗爲國家之元氣失之於文弱猶愈失之於矜夸所當撫國勢而念四維之重有謂報政之始早以卜其寢衰則宜變乎其舊者顧治法以淳樸爲盛衰可議在優游不當併議其忠厚何不振積弱而追九戔之歌中比云禮制者道所由昭而魯則積習不返焉僭郊遂止止史角僭禘實始閔公瀆亂不經明

堂位之言何可信也然而易象春秋列國且欽其秉禮則知儒書之貽誚正無害方策之遵循誠能奮發有爲而急求變計將邱賦不作句乘即可足兵稅畝不譏什一已堪裕國王遵之易直不難近取而卽是矣名分者道所由立而魯則相忍爲國焉括戲兆兄弟之爭隱閔遘君臣之變賢親爲務先元公之命無復存也然而豆區鍾釜私室未敢以閭奸則知亂世之奸雄尙屈於儒生之議論誠令勵精圖治而幡然思變將魴鱖不歌於敝笱而化螭睢巢鴈鴒不驗於歸禰而分嚴冠履大道之行初無俟舍新而圖舊矣末比云夫作紫誓以征徐其詞若素精於兵法何以因人紀銘鐘之績恃命救懸磬之危曾不開一將功成藉口於敕甲敵千之盛良以文教相仍武功非其所習耳因此意而振興之絃歌之不輟也豈王澤不勝於霸圖哉且制周官以致治其法若特備於理財

何以孝公咨訓於夷宮僖公考牧於垌野曾不聞憂貧患寡旁及生金生粟之謀良以禮義相深富强非其所尚耳本此意而轉移之斧柯而可假也豈東周僅形諸夢寐哉萬虞臣不喜此文嫌其毫無氣勢余謂此種題易於粗豪而難於縝密似此恬吟密詠無非經籍之光吾不能不爲之心折也郭韶溪評云采縛骨堅五花散作雲滿身不比凡馬空多肉似之矣

會禹門

奮春

與余爲總角之交日以時文相攻錯所存文稿多在

余篋自余計偕入都並余窗稿俱爲人竊去不可復追至今懊恨記余在鄉蘇年師館中作三過其門而不入題文講下以石紐西羌兩地分屬其門而以導某水過之云云每地皆還他三過頗爲蘇年師所許可以稿示禹門禹門曰前半考據雖亦附會成文然風簫中得此自可出色後半則聲調近啞非所以逢時因就余原

文別加錘鍊賴改舊觀自注云青出於藍未知能青於藍否余爲
頰首諷誦不輟今兩原稿並失僅能背誦其後二比之第一比並
錄之以誌當時剴切之殷情也文云痛羽淵之遠殛黃熊就餒不
得依祖宗邱墓之鄉廬舍依然人室祇深銜恤耳蓋九載汨沈幾
經勞瘁惟繼起有難寬之念斯蓋愆有子不留遺憾於先靈幹父
之蠱方殷卽將母之歌奚訴也故轍迹重經亦有會逢其適而萬
民昏墊何以家爲盼予室之翹翹不啻以憑軾當下車之泣遐聲
配色極似陳星齋而致孝乎鬼神後二比文情惜對比不能舉其
一字矣

禹門生有夙慧詩文儷語搖筆立就無體不工詩爲上時文次之
雜體又次之十一歲游庠十七歲舉於鄉三試春官並薦而不售
遂由大挑出爲知縣治臨安有慈父母之稱不三年以勞卒於官

年甫三十無子以其弟霽峰刺史之子少坡編修

元梅

爲嗣亦方

壯而夭折禹門詩文遂至今無人收拾亦足哀矣余偶於兒輩書
案見有三家者至天子穆穆題文猶是禹門手跡而余亦有評語
在後最愛其後二比云明潔本告虔之具而蒞玉蒞壘非其地則
庭階皆覺無文天子以一心崇昭假於先靈卽以一身會冠裳於
百辟詩若曰爾勿謂白旆龍旂奔走王家者可以數數也惟介時
事於春秋始得從而展謁焉而不然則已褻也魯大夫而聞先哲
王明德馨香若此乎刳羊者備矣繫冢者勞矣文子文孫均荷天
寵敬告瞽瞍三復焉可也聲詩多祈福之文而贊玉贊幣非其人
則磐管徒成虛器天子於將事時肅一身之僣愼卽於卒事日靖
列服之心思詩若曰爾試觀和鸞條革趨蹌殿廡者若是彬彬也
而合萬國之歡心則必因而襄事焉而不然則已疏也魯大夫而

聞先哲王祀事孔明若此乎神聽者和矣歌詩者出矣在天在廟
無作神羞勒在篇章核實焉可也自評云樓臺倒影氣象萬千而
按之題位仍復一絲不溢余亦有加評云積素淵中散采彪外劉
舍人所謂藻耀高翔文筆鳴鳳也茲並登之

廖佩香英與余同在敏求堂會課久困童子試而志節不衰年三
十六始獲一衿三十九選卒余與曾禹門及余兄曼雲屢資其家
無子余又資其立嗣今未知其能成立否也生平所作駢體文爲
最古近體詩次之時文又次之小賦尤工歷任學使者無不擊賞
之作時文亦喜以賦筆行之嘗記其入於海題中後四比云閒稽
列史所載有居北海之濱者非伯夷耶陽襄殆慕其節而欲效其
人未可知也乃彼也弟兄偕隱猶傳遺響於西山此也僚友同心
莫嗣好音於東土唱子和汝蓋怵怵然有黃農虞夏之思矣又有

居東海之濱者非太公耶陽襄或聞其風而思繼其業未可知也
乃彼也暮年佐命鷹揚推向父之風此也與世相遺鴻飛免弋人
之慕銷聲匿跡蓋悠悠然無龍彪熊虎之占矣抑又聞之國有令
主徧爲虛穴之求則有舉於海者矣彼陽與襄胡爲入而不返也
與其操土盲於殊俗而聞聲感舊祇增忉忉於中心身將隱矣予
其行乎固不妨於煙波涵洞之鄉自結無聊儔侶世莫予宗閒作
沈淪之想則有浮於海者矣彼陽與襄胡竟入之必深也與其流
逸響於中州而洗耳沈淵莫挽江河之目下歸去來兮即須我友
又何憚於林密山深以外別成有伴巢山

余撫粵西未下車即默計吾鄉同郡舊好在粵者只有兩邑侯皆
夙著循聲一爲陳紫瀾肇波一爲游文石長齡迨入桂林始知兩
人皆早已視職且官欠繫繫並有不能自全之勢余爲之極力捄

描經年而悉就緒不但夙逋一洗並可光復源官兩人皆素洽輿情者闔屬爲之稱快時紫淵宦情已淡余因延之署齋課四五兩兒紫淵本文中豪初入館兒輩尙不知其根柢一日以山也千乘之國可使治其賦也爲課題館中作者四五人皆知就千乘二字數典似各自以爲能而皆不愜紫淵之意兒輩頗疑之余察知其情乃集作者而告之曰此題是余四十年前與爾師同會課者余文已不存而爾師文我尙略能背誦之無論前後幅沈著高華兼而有之非淺學所能猝辦卽中兩比實還千乘處與核詳明恐皆爾輩所未曾夢到也其文云以王制之令賦計之小國二十五乘次國四十九乘必大國然後百乘簡稽固無難耳若今之大國提封十萬井也爲夫八十萬人也乃制爲三軍僅用其十之一者訓練則人人知兵不苦其多調發則七家一兵不嫌其少又況卒旅

伍兩起自族黨比閭軍將師帥選之大夫卿士故兵無虛糜之費將無專擅之權其相統攝者微也嚆則能之以周官之令賦計之諸男一同百乘諸子四同四百乘卽諸伯九同猶不足千乘整齊亦尙易耳至于千乘之國甲士三千人也步卒七萬二千人也乃致以下劑待十四役而一周者戎閒益一兵卽損一農田野增一農卽畜一兵所以無事屬之司徒校其馬牛車輦有事征之司馬辨其饒饒旌旌況四時但以田稱儀禮不以軍與此其用意者深也誰則能之按兒輩自得聞此文始心悅誠服紫瀾而紫瀾亦盡心教誘師弟極相得信乎爲人師者不可以無本也

余掌浦城講席六年高才生不下十許輩而必以張暖雲夢魁爲巨擘暖雲才氣發越文如其人不喜餽飭文字而天分旣高觀書輒有領悟又能博文強識故遇真典題亦復元元本本如數家珍

嘗會課千歲之日至二句題文記其末二比云顧常詳而考之凡日之行至七十餘年而少差自周公五年至惠公三十八年壬申朔旦日至凡七十六歲者五定公七年己巳朔旦日至凡七十六歲者三至戰國康公四年丁亥朔旦日至凡七十六歲者二則上計周興之初所謂千歲者非也夫往者可鑒卽來者猶可追已因而遞而推之凡厯之積至四千餘年而得元七閏爲章朔至之月非甲子二十七章爲會朔至之日非甲子三會爲統朔至之時非甲子至於三統爲元不猶此千歲之積耶夫後之視今當亦如今之視昔云爾提嬰鉤元如對李淳風僧一行一流人物

萬虞臣之子雲程孝廉能讀父書文筆得虞臣指授取鎔經義緯以深情卓然可以問世惜厥年不永後嗣凋零並虞臣諸稿皆不能守無論孝廉之文矣余輯閩文典制鈔僅得錄存其耕者九一

仕者世祿一藝真吉光片羽也其詞云區九爲井之制肇自軒轅
降而尺度短長子姒遞因而損益良法其不敝矣顧岐山險阻可
井之地無多則賦入原乏贏餘之數又況方伯之職新膺土田之
封如故卽因征繕之繁而加賦亦事勢之所無如何也乃文王則
有九一之法焉念我周穡事開基后稷降種於秬糜農官世服於
高亞今日之主伯亞旅何一非列祖所留貽而忍賡其生乎是故
助法本於商家則以創爲因定一國之模實以奉一王之憲徹田
傳於慶節則有基勿壞準三單之舊卽以開百畝之先迨至編戶
大定以還制因鄉遂溝涂定以十夫地別肥瘠田萊權其三易王
者命司徒以治地夫三爲屋步百爲畝且合一世而大其範圍以
是知九一非初制之權宜也已賞延于世之謨陳於舜陞降而盤
庚作誥世家亦致其丁寧舊人其弗替矣顧西土宅俊譽髦萬彙

之差必飭則田產宿爲孫子之謀而訪八學而德尙未成論官而材方待用第援匪頒之式以馭臣將升斗之權非所望也乃文王則有世祿之制焉念先臣小大從公或贊契龜於幽邑或襄走馬於岐山今日之社稷壇壝何非賴羣工之櫛沐而忍靳其報乎是故賢能登六計雲祲仰給於天家則知廉吏之可爲而盈庭胥勸勲績紀太常閭閻不淪於皂隸則待功臣者不跡而國體無虧迨至武成大告之餘大而白茅載錫河山延帶礪之傳小而駢旌旣盟尹姑衍衣冠之澤王者命司勳以紀績公田不鬻庶子有官且合百世而降其崇報以是知世祿實惠下之盛典也已鄭蘇年師評云揚班其采富韓其心亦足以傳孝廉矣

御義叢話卷之十九